



Aurland, 14.06.2020

Valdansvarlege

Vår ref.
2020000337-12

Dykkar ref.

Sakshandsamar
Øi Knut Fredrik, 57641200

Arkiv
K2-K40

Informasjon om hjort- og elgjakta i Aurland kommune 2020

I det følgjande har me oppsummert hovudpunkta knytt til hjort- og elgjakta i 2020. Informasjonen vert sendt ut på e-post slik at det er lett for dykk som valdansvarlege å senda vidare ut til grunneigarar og jegerar i dykkar vald. Informasjonen vert også sendt ut i brevform, med det formelle fellingsløyvet (som skal fyllast inn og leverast etter endt jakt). De kan likevel sjå i vedlegga kva som er tildelinga av hjort og elg.

Det er framleis spanande tider for hjorteviltet og oss som lever med og av dyra. Alle 15 kommunar i Nordfjella-regionen er bedt om å redusera bestandane av hjort og elg til under halve storleiken av 2016-nivået. Dette for å hindra at skrantesjuka får fotfeste i hjort- og elgbestandane. I Aurland kommune trur me at hjortebestanden er redusert ein god del allereie. Bra jobba! Men truleg har me endå eit stykke igjen før me er på tilrådd tettleik, og ambisjonane for felling denne hausten er høge. Aurland kommune har som mål at det vert felt minst 268 hjort. Aurland og Lærdal har mykje høgare tettleik av hjortedyr enn dei andre kommunane i Nordfjella-regionen. Kommunane har også store areal med overlapp mellom arealbruken til hjort/elg og Nordfjella sone 1. Difor er det spesielt viktig at me i Aurland og Lærdal klarer å ta ned bestandane av hjort og elg. Ein fryktar framleis at det er smittsame prionar i miljøet i sone 1. Lærdal kommune har tettare bestand av hjort enn Aurland, men jobbar også hardt for å redusera bestanden sin.

Det er ikkje påvist smittsam skrantesjuka korkje på hjort eller elg kring Nordfjella. Dette er godt nytt, og jo lenger tid det går og dess fleire dyr som vert testa, dess sikrere vert me på at skrantesjuka ikkje allereie har smitta over til hjort/elg.

I punkta under prøver me å lista opp viktig informasjon for jakta til hausten. Om det er spørsmål, er det berre å ta kontakt!

Kvote

Gjeldande bestandsplan for hjort er for perioden 2018-2020. Det er altså siste året i denne planperioden. Målet har vore å fella 200 hjort kvart år. Målet for i år er 200 hjort pluss dei 68 hjortane som ikkje har vorte felt dei siste 2 åra. Altså totalt 268 hjort. Det betyr at kvart vald må sikta på å fella fleire dyr enn i fjor! Det er fornuftig at desse «ekstradyra» i stor grad er kalvar og ungdyr.

Dei valda som er medlem i Aurland bestandsplanområde for hjort, kan nytta alle dei ubrukte fellingsløyva frå 2018 og 2019. Dette gjer at det totalt er 724 tilgjengelege fellingsløyve for hjort denne hausten. I tillegg er det i Aurland fri kvote på kalv. Det er med andre ord ikkje tal fellingsløyve som burde vera flaskehalsen for å nå målet om

268 felte hjort. Alle fellingsløyva er gitt som frie frå kommunen. Valdet burde sjå til bestandsplanen for fordeling av felling, men kan også gjere lokale tilpasningar.

Sjølve bestandsplanen kan de lesa her: <https://www.laerdal.kommune.no/aurland-bestandsplanomraade-for-hjort.386224.no.html>

Jakttid

Kommunane kring Nordfjella har utvida jakttid på elg og hjort. Den formelle jakttida er 15. august-31. januar. Det er fredning frå jul til nyttår. Aurland hjorteutval oppmodar til at jaktinga fyrst og fremst skal føregå før jul. Difor burde alle valda sikta på å gjera seg ferdige med fellingane i god tid før jul. Om me ser at det er eit stykke igjen til målet om 268 felte dyr, vil me informera om trongen for ytterlegare felling. Då også om kva slags dyr det er ønskjeleg å få felt.

CWD – prøvetaking

Alle felte dyr som er vaksne skal jegerane ta prøve av sjølv (altså ikkje kalvar og 1,5 åringar). Jegerane tok veldig bra med prøvar i fjor, bra jobba! Prøveresultatet er svært viktige for vegen vidare. Info og utlevering av prøvemateriell skjer som i fjor, på jegermøte i august og i kasse på fiskehuset ved Turlidfossen. All generell informasjon om CWD er samla på: <http://www.hjortevilt.no/skrantesjuka/>

Kjeveinnsamling

Det skal vera kjeveinnsamling i kommunane kring Nordfjella. Alle kjevar frå hjort og elg som er 1 år eller eldre, skal leverast på fiskehuset ved Turlidfossen. Det er altså kjevar frå ungdyr og vaksne dyr som skal leverast. Kjevane må vera reinskjært og helst turka. Kjevane merkast med merkelappen som er å finna i posen for CWD-prøvetaking. Merk CWD-prøven med klistrelappen, og kjeven med den «store lappen».

Jegermøte

Me tek sikte på å ha eit jegermøte i august. Det er mykje info og sikkert ein del spørsmål. Info om dato og stad for møtet kjem seinare.

Helikopter

Me jobbar for å få til ei vidareføring av tilbodet om utflyving av slakt frå hjort- og elgjakta. Info om dette kjem når me veit meir.

Sal av slakt

Ordninga med mottak av slakt på Håbakken er avslutta. Det har dei siste 2 åra vorte levert få slakt hit. Men det er framleis mogleg å selgja slakt. Ein lyt då avtala med Haugen gardsmat i Flåm v/Odd Ohnstad. Telefonnummeret til Odd er 915 39 026.

Sett-og-skutt

All jakting skal registrerast på Hjorteviltregisteret. Det er viktig også å registrera jaktdagane utan felling eller observerte dyr. Registreringane gjerast anten ved å logga deg inn på www.hjorteviltregisteret.no eller ved å lasta ned settogskutt-appen. Registreringane fungerer no veldig bra og gir oss moglegheit til å følgja med på fellingsresultatet undervegs i jakta, slik at me kan informera om status og måloppnåing. CWD-prøvene skal også registrerast her. Prøvesvaret finn de på hjorteviltregisteret under «Helse»-fana.

- **Viktig:** I 2018 vart det gjort nokre endringar på korleis jegerane skulle registrera jaktinga si på settogskutt. I korte trekk var endringa den at alle

observerte dyr skulle registrerast, uavhengig av om dyret med sikkerhet var sett fleire gonger/av andre. Me trur ikkje mange fekk med seg denne endringa, fordi det ikkje var godt marknadsført. I tida no er sett-hjort-registreringane viktigare enn nokon gong fordi me på den måten kan følgja med på endringane i bestanden opp i mot målet om reduksjon. Ei endring i måten å føra på er difor uheldig fordi det vert vanskelegare å samanlikna tala mellom åra. Difor har me beslutta at me **IKKJE VIL FØLGJA** endringa som det er lagt opp til i føring av sett-hjort. Alle jegerar i Aurland skal altså føra sett-hjort som før, og ikkje ta hensyn til endra instruks! Ergo, registrer sett-hjort som «vanleg»!

Human jakt

Sjølv om det er ambisiøse mål om høg felling, er det viktig at de tenkjer sikkerheit og human jakt når de er ute. Skyt kalven før kolla! Hugs plikten til å ha tilgang på ettersøkshund – og bruk hunden når uhellet er ute! Her har me ein del å gå på!

Samarbeid

Dei valda som er medlem i bestandsplanområdet har moglegheit til å flytta løyve mellom valda, og mellom åra i bestandsplanperioden. Dette er brukt i ein viss utstrekning, men det er mogleg/ønskjeleg å nytta dette endå meir. For å flytta løyve mellom åra i planperioden trengs det ingen avtale. Eit vald som har igjen løyve frå 2018 eller 2019, kan nytta desse no denne hausten. Alle fellingane skal meldast inn i fellingsrapporten det året dei er felt. For å flytta løyve mellom vald, må valda ha ei skriftleg avtale om samjakt. Ferdig formular ligg på heimesida til kommunen. Det valdet som får fellingsløyvet tildelt, skal rapportera resultatet, uavhengig av om løyve er nytta på eit anna vald. På settogskutt registrerer jegerane fellinga på det valdet som dyret vart jakta på. Fellingsavgifta vert fakturert valdet som fekk løyvet. Det som truleg vil vera begrensande for jaktuttaket til hausten er jegeranes tilgjengelege tid til å jakta. Dei valda som «føler seg ferdig» med å jakta i løpet av hausten og som har mykje dyr i terrenget, bør vurderer om dei kan slippa fleire jegerar inn i terrenget. Dette kan gjerast anten ved at jegerar har med «eigne fellingsløyve» eller at fleire jegerar kan koma inn og jakta på dei løyva som er gitt det aktuelle valdet. Dei merka hjortane fortel oss at dyra nyttar mange vald i løpet av året. Dei dyra som ein kanskje opplever som «eigne dyr», flytter seg oftast mykje, både i løpet av døgeret og sesongen.

Fellingsavgift

Avgift ved felling i 2020 er som følgjande:

Fellingsavgift:	2020
Hjort ≥ 1,5 år	411
Hjort kalv	0
Elg ≥ 1,5 år	537
Elg kalv	0

Skitt jakt!

Med helsing

Øi Knut Fredrik
Sakshandsamar

Brevet er elektronisk godkjent og er utan underskrift

Vedlegg:

- | | |
|------------|---|
| 14.06.2020 | Tildeling av fellingsløyver for hjort og elg i Aurland 2020 - definering av kommunal målsetjing for felling |
| 14.06.2020 | Tildeling av fellingsløyver for hjort og elg i Aurland 2020 - definering av kommunal målsetjing for felling |
| 14.06.2020 | Aurland hjortevald 2020 |
| 14.06.2020 | Aurland elgvald 2020 |